



Pharaon voulant honorer , & autoriser Ioseph , le fit seoir sur son chariot Royal , & proclamer seul Gouverneur d' Egypte.

PHARAON connoissant les dons & graces speciales que Dieu auoit fait a Ioseph , tant par l'interpretation de ses songes , que par le prudent conseil qu'il luy auoit donné , il luy dit : Puis que Dieu t'a donné à connoistre tout ce que tu as raconté des choses à venir , pourrois-ie trouver vn plus sage , & semblable à toy ? Tu seras sur ma maison , & tout le peuple obeïra à ta parole : & sans ton mandement nul ne mouuera la main , ny le pied en la terre d'Egypte , tant seulement ie seray plus grand que toy du siege Royal. Outre plus , Pharaon dit à Ioseph : Voicy ie te commets sur toute la terre d'Egypte. Adonc il tira l'anneau de sa main , & le mit en la main de Ioseph , & le fit vestir d'vn accoustrement de crespé ; puis luy ayant mis vn colier d'or au col , le fit monter sur son second chariot Royal , faisant publier par le Heraut , que tous flechissent les genoux deuant luy , à ce que chacun d'eux sceust qu'il estoit Gouverneur en la terre d'Egypte. Et Pharaon changea le nom d'iceluy , & l'appella en langue Egyptienne , Sauueur du monde. Ioseph trouua donc telle grace enuers le Roy , que toutes choses se passoient par son ordonnance. En laquelle charge il se comporta avec vne prudence admirable , au contentement du Roy , & de tous ses seruiteurs.